



保晚齋集

詩 辭

樂 歌


卷一

^ 16  
2396  
1



和  
2396  
/ - 2

同賜處藻



求見保晚  
齋稿吟

寄一律  
雨過山屋幙

午風徐閒

閱恬淡十

軸書恬解

多從三易

邃典刑猶  
見四佐餘

陰陽綜錯  
心頗契雲

水流行質  
本靈保晚

堂中求  
草早文

園當日較  
何如

通政大夫吏

曹叅議兼

奎章閣直提




學知製教

春秋館修撰

官臣鄭志儉

奉

教謹書



賀知章致仕而歸唐宗賜以五律一篇當時誇  
為盛事而未嘗聞宣取與稿也歐陽公題田宋  
帝覽與內外制集序文屢加歎賞而未嘗賜以  
詩也保晚公所被寵數兼賀歐二公而又通以  
奚啻較早於茂陵之求也哉公雖謝事家居朝  
廷有凡編輯公輒承命掌典事 聖上有凡述  
正輒召公示以俾得與討論是正此又昔人之  
所無而今日館閣諸公所不得望也公自蚤歲  
為文章力追古人不顧流俗雖黃雖短篇尺跡

收蓄是勤要以俟後世之子雲而今以巾笄之  
藏獲被 雲漢之光題品一下聲價大定是將  
藉以不朽於千百代而六十季辛苦紙上不為  
枉費心矣重以爲公賀

聖上六年壬寅孟秋大匡輔國崇祿大夫議政府  
右議政兼領 經筵事監春秋館事李福源敬  
書

保晚齋集總目

卷第一

辭

樂歌

詩

卷第二

詩

卷第三

疏劄

卷第四

疏劄

卷第五

疏劄

啓

卷第六

書

卷第七

序

卷第八

記

卷第九

題跋

雜著

卷第十

玉冊文

竹冊文

頒教文

箋文

上樛文

祭文

卷第十一

碑

墓碣

卷第十二

墓表

墓誌

卷第十三

行狀

卷第十四

行狀

卷第十五

謚狀

卷第十六

蠡測篇

保晚齋集卷第一目

辭

敬和景賢堂賡載辭韻 并序

次歸去來辭韻 并序

續定情辭 并序

樂歌

親臨觀刈樂歌

奎章閣曬書儀樂歌

燕射禮樂歌

詩

夜起

夜坐

幽居

麥田吟

湍阡志感

呈李樛村 廷變

題李先甫 堽 詩卷

夢李樛村有感

梧邨吏

秋夜歎

墨園望春

忠州月川

西湖別墅

西湖十景古今體

白石早潮

青谿夕嵐

栗嶼雨耕

麻浦雲帆

鳥洲煙柳

鶴汀明沙

仙峯泛月

籠巖觀漲

鷺梁漁釣

牛岑採樵

李校理宜菴挽

次內弟李季浩叙遊金剛山詩韻

次禁直諸學士韻

李綏之福源李仲浩瀟來訪拈韻

吳判書彥儒挽二首

南山之麓

谷雲和陶淵明停雲

嘉木和陶淵明停雲

樂彼之室送內弟李稚浩澂按察海西

咸興樂民樓

利城侍中臺

南兵馬營

城津敬次先君子板上韻

李夢瑞獻慶謫慶源寄詩依韻答之

次李深遠惟秀寄示韻

次鄭孝善述祿讀易韻



夢見亡女感懷

七寶山金藏寺

望海峯

次題北妓彩心詩軸 并序

楊門途中

皇壇親享敬和 肅廟感懷詩韻 并序

喜雨應製

海春君 林挽二首

金知事 鎮東挽

陵幸時病闕祇迎禮感書長句

寄家兒浩修謫所

夜雨

閒居書事三首

雨不止

叢竹

白蓮

月桂

亦知

送家弟繼仲 命善謫濟州

白頭山詩用韓文公南山詩韻

白頭山歸路得黃良伯最彥寄詩次韻答之

次題青蘿亭二首

金副提學時察挽并序

讀書和陶淵明形影神三首

和陶淵明九日閒居

歸山三首

補甲山府使和陶淵明示三郎

甲山官舍次梁鳳周韻二首

夷山雜詠八首

甲山貶所伏奉讀書錄 御賜

次梁南二客登南樓韻

自甲山承召將歸次梁南二客韻三首

丁巳夏陪先君子至元山交濟倉落成仍為海

獵之遊後三十二年自甲山貶所召還過之

敬次板上韻

山家樂六首

金叅判善行挽二首

幽居書事二首

次韓文公謝鄭羣贈簞韻寄仙槎守成大中

浩歌行

永保亭凌虛閣次浩修韻

永保亭次杜工部園樹八韻

李叅奉命奠挽

君臣同會一堂中十韻應製

安市城

寧遠行

曉發兩水河

榛子店并序

石鼓歌

燕館新歲與副价行臺同賦二首

清節祠次副价洪養之梓韻

清節祠再次副价韻

勵志三首

以冢宰違召補忠州次東軒板上韻

賓僚行

梅下校勘啓蒙

敬和 御製清明詩韻

山居雜詠二首

敬次 王世孫示賓僚韻并序

敬謝 王世孫賜新薑兼侈 手札

留別箕城士民 并序

聖節禁中與奎章閣同寮呼韻各賦

奎章閣褒貶後入侍逍遙亭分韻應製

洗馬臺親臨大閱敬和 聖製

吾生

偶吟

齋居謾詠二首

和家兒澄修菊花詩韻三首

黃鶴翎

紅鶴翎

醉楊妃

保晚齋集卷第一

達城徐命膺君受著

辭

敬和景賢堂賡載辭韻 并序

戊辰春三月 上既摸 肅考真容安于殿召董事  
諸臣於景賢堂賜餽餘奏軒架以勞之親為辭命和  
臣命膺以位卑不敢則促命之和夜分乃罷既退敢  
用原韻述三章以紀其始末曰

大孝既備兮樂奏庭中肅穆 天表兮復臨殿東愀  
然如見兮小大臣同



濟濟執役兮咸在堂中  
王命勞嘉兮內臣西東  
既醉既飽兮威儀卒同

周宴鹿鳴兮歡娛維中  
天氣降下兮地氣自東  
一弛兮文武所同

次歸去來辭韻

并序

余少善病無仕進意及以洗馬入侍感上以立揚  
勉之力爲舉子業釋褐十二年位亞九卿遭逢亦盛  
矣而余才識踈不能及明時效尺寸往往罹讒說顛  
蹟者數周任有言曰陳力就列不能者止余於是乎  
可以止之乃俯仰因循莫之勇決乙酉秋家兒浩修

以臺閣言事遠謫余亦不安於朝迸出郊居偶閱陶  
淵明歸去來辭蓋其爲辭時差少余八九年矣嗚呼  
古人之知非何早也後人之知非何晚也余嘗鏡考  
前哲之行藏時有先後跡有微顯其歸一而已故蘇  
長公之未忘當世也而亦欲以晚節自托於淵明是  
豈苟於爲文而然乎遂和其辭曰

歸去來兮青山有約可以歸夫既知足而知止又奚  
戀而奚悲緬神仙之不遠逝前脩之欲追春秋回兮  
五十孰先我而知非曾拓沼而種荷葉可裳而華衣  
鼃吾馳其東出望岫色之依微川若迎人出谷競奔

垂柳蔭垣喬木窺門入室俯仰琴書偕存載彈載詠  
何必觴罇扶藜筇以陟園攀桂枝以歡顏知靜散之  
奧區所遲暮之便安巖經雨而欲苔戶隨風而自關  
何曾到以俗事曖近遠之多觀憑軒牕而極目杳雲  
帆其往還岡如峙而澗抱利居貞之盤桓歸去來兮  
終吾生而遨遊旣冥升之踰分復踳跼兮何求人生  
期以百歲歎少樂而多憂吾將脫略乎形役任嚶嚶  
於田疇或野而屐或水而舟招野老而携袂披草萊  
而登丘山蒼蒼而壁立水泱泱而派流道若是其無  
隱般上下焉不休已矣乎今我不樂待何時曷不托

此聊淹留胡爲乎俛俛迷所之守拙真吾事善世安  
敢期悔初心於經濟留晚計於耘耔收匡時之昔藁  
賦觀物之新詩曰吾思之爛熟何待龜策乃決疑

續定情辭

并序

漢張平子爲定情辭冲澹蕭散千載之下猶可想見  
其忠君憂國之誠辭豈在多乎哉余居西湖適逢初  
秋感時物之貿遷歎古人之先獲續其辭曰

天宇寥廓兮斗柄西流高梧滴露兮一葉先秋促織  
在壁兮玄蟬初收我思美人兮云何不憂容鬢欲改  
兮歲月易逝

樂歌

親臨觀刈樂歌

豐年多稼來牟孔碩維此觀刈我家成式青旂朱紘  
稅于東藉自古躬畝示民禮樂

豐年一章

出大次  
樂章

崇壇黼座化日昭明或陞或降朱齊鏘鳴朱芾葱珩  
玉色金聲萬民咸覩是則是程

崇壇一章

陞降壇  
座樂章

宗公左右濟濟蹒蹒各勤乃事率禮彌章黼黻 王  
猷以琮以璜永言匹休邦家之光

宗公一章

諸臣拜  
禮樂章

中田有秀薿薿油油千耦腰鎌載芟載收嘒嘒管聲  
雜彼農謳農謳維何祝 王千秋

中田一章

觀刈  
樂章

菟其青箱黃茂在中肅肅端冕顒顒儀容上帝之錫  
曷敢不恭薦 廟則孝成民曰功

菟其一章

受麥  
樂章

禮儀告成邦用豐康凡厥庶民視此神倉 君子言  
旋福祿來昌龍旂煌煌鸞聲鏘鏘

禮儀一章

還大次  
樂章



亦既勞止嗟爾農民酌以大觥酬乃苦辛公堂稱彼  
宛其豳淳嘉與同樂卿士庶人

亦既一章 勞酒樂章

奎章閣曬書儀樂歌

翼彼之堂 聖謨洋洋 王則受之不愆不忘敷而  
為治黼黻文章天乃錫 王萬壽無疆

翼彼一章 奉謨堂展拜樂章

牙籥竹簡有翮芸葉風之曝之蠹魚載戢禮斯樂斯  
天人攸變子孫千億永言為法

牙籥一章 曬書樂章

滌場有饗娛賓有將矧伊緗縹大道攸藏朋酒嘉肴  
鼓瑟鼓簧以永今夕好樂無荒

滌場一章 宣醴樂章

翻經散帙以卷以束煌煌鈿軸縱橫簾閣譬彼靈著  
由感而寂用之不屈庶幾無斁

翻經一章 叔書樂章

燕射禮樂歌

皇矣哉我 后之德之純文經武緯昭令章外體直  
內志正獸侯抗龍旌張白羽流兮成剡注舍矢如破  
網四方皇矣哉我 后之德之揚

皇矣一章

大夫君子御于 王所則燕則射威儀孔偕十六其  
耦

大夫一章

詩

夜起

東牕忽依微知是月上林攝衣下前除松竹已交陰  
草露侵屨濕寒蟬繞砌吟人生晝多營真意易浮沉  
却到清夜中偶然發省深

夜坐

稍稍山路暗眾鳥各歸棲明星帶茅簷銀河垂遠溪  
夕煙殊未歇邛菴時時急隔籬聞人語來日是驚蟄

幽居

幽居長慵性日與塵事疎扶杖省畦麥呼童折園蔬  
時與丈人遇農談日斜初望煙歸吾廬琴書却自如  
抱膝頽簷下默看雲卷舒

麥田吟

為性頗踈慵謀生不自力偶得一區地學種五斗麥  
前冬雪盈尺皆云驗豐熟陽和正布澤阡陌多新綠  
荷鋤俯我晦芽甲半欲枯田翁笑向我為農何太迂

雨暘雖云調糞治不可緩豈伊諉天時人力居其半  
元聖戒敷蓄鄒孟譏不耘子雖不學稼此事耳亦聞  
旨哉老翁言言近意偏長偶問治田術從得學道方  
聰明雖自天進修亮由己顏生不好學應爲一鄉士

湍阡志感

自我訣慈顏悠悠幾歲月晨昏斷北堂饋奠輟下室  
竭來展松楸俯仰感時物聖人重禮制吞聲空掩抑  
憶昔在膝下謂言長侍側承顏與順志自知多不力  
追思復填臆此恨何以洩怡愉奉嚴親蚤夜誨弟侄  
亦復善吾身令名使旁達生平劬勞恩以是報萬一

呈李樗邨 廷變

往者拙修老儒門大宗師亦有三淵翁健筆馳雄詞  
遺風久寂寞高躅繼者誰卓哉樗邨子乃復生斯時  
經綸拙老餘文章淵翁知况有一隻眼璞不敢欺  
徵書屢到門再拜輒固辭嶽嶽到白頭終不悔前爲  
自我初辨香常懷望洋咨豈無一斑窺難盡全鼎奇  
前日寄我來縱橫百篇詩堂堂正陣伍浩浩無畔涯  
瀉出胷中識慷慨復咤悲讀其雜言詩人情辨銖錙  
讀其大風詩諷意入幽微自餘諸篇章澹蕩皆有思  
不以我固陋令我施砭磁我有何見識先進敢是非

但道先生識病國堪為鑒可使長風憲薄俗是繩規  
可使居蘭臺袞鉞儼昭垂不然正紳笏明廷羽儀之  
惜哉閒處老斯世一無施

題李光甫堦詩卷

吾嘗治聲律難哉是天機及讀光甫詩悄然却自疑  
篇章不滿百字句不求奇諷詠三四遍翛然清我思  
恰似瀟湘岸落木蕭蕭飛又如栗里宅秋菊映踈籬  
不知有何法其詩乃如斯要妙可學能清高豈力為  
知應詩出處蕭灑洗膏脂

夢李樗邨有感

一別度三春泉臺知不知忽然今夜夢依倚侍床帷  
儀容隔煙霧聲音若倦疲謂我交不擇戒我言不時  
富貴與利達申申責以規覺來記所聞歷落無一遺  
始疑公無恙追思今已非豈知冥冥裏猶復眷愚癡  
念罷仍轉身燈光尚依微前冬未盡淚重為此夜垂

梧邨吏

我本京華人邈與畎畝隔亦知民力艱何曾有經歷  
偶來到農家周旋皆襍穢竟夜執綯索及曉向磽确  
男耕婦子饁雞犬不得息更有官吏來追呼事鞭扑  
謂是煙戶役急調軍一百面任恭聽命里長皆失色

方當農稼節軍丁何處得東邨有壯男西鄰有傭客  
憑釋耕耘具免此官家責喧呼至日中軍籍猶不足  
吏怒烈如火倒耒擊其額袖中有公文一一爲汝讀  
今日日之午整待官門北晷景已西傾十丁未言獲  
汝曹知里面郵罰何以塞面任潛低頭里長但垂脚  
含淚不敢出強笑進吏側吾家有好酒滴滴甕頭熟  
願吏暫就坐一醉趁時刻軍丁雖云多小人可充籍  
吏聽良久立顧語取來速痛飲數三盃欣然解怒目  
汝邨本如斗何以辦一百吾已敕某里如數防雇直  
汝勿煩憂慮歸家安耕鑿倏然掉臂去邨中遂闕寂

面任與里長撫額始感感時我排戶看茫然褫神魄  
昔在先王世民力何其惜歲不過三日用必以農隙  
土功待龍見狩禮竣秋獲戰伐豈不重十家但一力  
然且心惴惴無乃有怨讟春秋世忽降古道遂寂寞  
猶能得遺意租庸酬身役誰哉受人羊不復求芻牧  
一人或失耕百人俱不食矧伊一百人同時舍耕植  
春初九重裏綸綍霈陽澤君有如天仁臣無承  
流績嗟嗟爾百姓且莫歎苦厄安知今代人不有契  
與稷

秋夜歎

生平學究天人微不向身心加鉗鎚屠兒拜佛亦徒爾娼家談禮竟何爲盈架洋洋述空言富哉不見補毫絲朝悔暮然升載久屋漏頻成六里欺秋燈一夜默整襟不平伊懷說與誰皎皎本心日月明利欲不幸交食之登牲伐鼓嗇夫馳反復其光須及時休嗟年紀已晚晚一轉當如戶樞移將心不越日用間一行一住求合宜窮通脩短有彼天盡吾職分長如斯

墨園望春

韶光同萬陌煙火自千家得意含風柳無私過雨花鱸從貧婦斫酒遣小奚賒共指疎松外澄光一道斜

忠州月川

渺渺長川短短蓬行人從古幾西東腐儒不及長年汝半世嗟無濟物功

西湖別墅

名係簪纓籍身從襍隸居岫雲時補缺江日曉升虛簾卷千章帆牕開萬軸書邇來忘得失清夢問何如

西湖十景古今體

并序

余居西湖所暮朝者流峙所上下者魚鳥無味之中至味存焉遂分爲十景以各體賦其事命曰古今體

白石早潮

溟波知不遠日夜送寒潮喘息天升降精神月近遙  
勢吞星斗壯聲捲野山驕夾雨千雷過橫秋一氣寥  
龍來雲潑墨鵬徙雪翻蕭大地斯壺漏長江自暮朝  
孤舟人有語快閣夢如搖消息參前理何煩問老樵

青谿夕嵐

非烟非霧鬱盈岑造化吾今驗夕嵐缺處補來同彩  
石虛空描去異優曇卷舒有軸風吹助光氣成文日  
傍含漠漠輕籠藏豹窟霏霏細潤蟄龍潭悠揚經緯  
天高下平布彌綸地北南散入千峯殊未了橫分一  
水洞相涵無端化作祥雲五何術能移海島三浩浩

周流生萬象天機須向此中探

栗嶼雨耕

疎雨渡江鳴孤邨事晚耕雲端千畝直野外一天清  
滑滑衝泥去登登撥斫傾敢辭終日力秋熟萬家情

麻浦雲帆

斷崖橫截大江斜魚市如萍列淺沙萬軸常春今古  
浪千竿擁立暮朝霞來時不辨東南舶泊處分依上  
下家滄海百年成坦道誰知禮樂是生涯

烏洲煙柳

江柳元來翠何須媚翠煙翠煙風掃盡始見柳之天

鶴汀明沙

句回錯落遶平汀  
光氣虛明日射星  
夜夜寒潮淘洗出  
始知昭質賴滄溟

仙峯泛月

涼氣集淪漪  
素暉吐孤峯  
稍稍巖壑明  
萬象倏開容  
我時理舟楫  
凌過雲海重  
寒星繞短棹  
天柱倚一筇  
金光忽不定  
波心起魚龍  
俯仰一感慨  
何處有仙蹤  
山高月團團  
天長水溶溶  
溶溶去不息  
萬折日朝宗  
今古知如此  
往過來復從  
歸臥竹牖下  
容光處處逢

籠巖觀漲

籠巖之上觀水漲  
白浪汗漫彌江干  
千雷礚礚萬馬奔  
高臺傑閣欲漂殘  
崖沉堤變不須問  
夜來江漢何其寬  
長天去鳥翔不下  
龍蛇爭投沙泥蟠  
扁扁舟楫不自謀  
有時駕出山木端  
憶昔風清日朗時  
縈青繚白千萬般  
如何涇渭須臾改  
涯渚牛馬辨亦難  
嗚呼觀漲真奇觀  
滄浪一曲撫纓歎  
滄浪一曲撫纓歎  
河伯陽侯須莫歡  
天高在上地在下  
日星蕭森元氣完  
浩然真體誰能損  
崇朝蕩滌不盈看

鷺梁漁釣

隔岸紅蓼覆岸對  
漁白鷺窺漁升沉  
榮辱何世夢到



義皇太初

牛岑採樵

幽幽牛岑蔚蔚平林侯鎌侯斧三兩其任朝披行露  
夕憇松陰後先載路翼彼歸禽

蔚蔚平林幽幽牛岑以刈以束十千其擔朝涉深澗  
夕偃蓬簷我食我力不勞我心

心之不勞其用遐覃爨我甘饌煖我布衾想彼萬竈  
望我實深于以市之貴賤與咸

李校理宜菴挽

深院睡覺驚叩扉皂隸袖軸來求詩軸上細看蠅頭

字李君芳叔之哀辭芳叔嗚呼今已矣令我惻惻雙  
淚垂憶在成都迎節惠君以天郎下赤墀煌煌誥命  
蓋床帕玉立筵前讀宣之經營十載未酬志一朝勞  
君飾盛儀仙樓燒燭失清夜巫峽追月破綠漪我病  
歸臥江上邨跡踈班行舊親知前年赴召一入都君  
忽傾蓋語移時知君精華覺勝昔見君髭髮未變絲  
喜君襟度夷且曠豈弟眉壽理所宜誰謂舊游成一  
幻人生風燭乃如斯秋深荒菊病掩門有淚不得灑  
靈輻惟餘宿習詩腸在一篇題送薤露詞

次內弟李季浩淑遊金剛山詩韻

金剛之名流遠國金剛之山在海曲萬二千峯削蒼  
白蓮作其臺雪作嶽僧言移自佛氏力道言初從仙  
家得儒言波痕尚峯額天開地闢此留迹山經水志  
寂今昔強欲說來舌難着喧飀萬瀑不盈縮犖确衆  
城無平陸山上蒼茫山之足何況終始那可覲羣峯  
去天不盈尺忽若呼來上清客或似真人跨白鶴或  
似仙娘鍊彩石或擎棟柱天宇薄或列屏障塵寰隔  
幽禽高巢淨不俗虎豹深藏求無獲雲嵐朝暮若喘  
息變態千萬無不學靈芝散處鹿攸伏碧松蔭下草  
爲席銛如鐵剛嫩如弱子平到此難爲識嗟吾半生

處塵濁未有羽翮一朝作啣綸關北昔霧食遙望雲  
山思寥廓空寄魂夢遵海略恨無筇杖恣幽索纏育  
一疾悴已極櫪上良驥久躑躅偶聞賢弟催理屐薄  
言叩之君安適朝飛尺素告同約暮召僕夫戒行色  
東門朝日正旭旭後先羸馬與赤脚煩襟一夕忽疏  
滌載塗何恤時枵腹初登毗盧餐瓊液終向雪嶽盪  
曾臆凌高長嘯竦神魄臨流抱膝潛靜默歷歷窮搜  
神仙宅衣上染盡蒼翠積條如大鵬風爲翼又如夸  
夫日之逐長篇跌宕寫所樂相與朗吟山寺夕俯仰  
天地渾無惕試看身上薜蘿服塵中膏火自相賊何

如入荒一揮斤歸來充然得所欲向我疊疊語無惜  
我觀賢愚同寂寞况乃人生不滿百喜君操術知所  
擇聞君高論心自釋讀君篇章還錯莫何由萬緣都  
擺落生平雖愧仁智德素心猶自在淡泊毫端一瀉  
曾中忤寄與風簷展而讀

次禁直諸學士韻

見說承明直重陽興不虛秋分霄漢上香襲御爐餘  
竹塢濃陰轉梧埤俗事踈吾衰還勝賞瓊軸落幽居

李綏之福源李仲浩滿來訪拈韻

早起催開白板扉茶煙一抹靄朝暉妍妍細草高低

出拍拍幽禽下上飛南里諫官呈告至東隣學士自  
公歸煙花三月雲臺約好試春天熨帖衣

吳判書彥儒挽二首

學士高名日月爭當時褒贈已哀榮皇穹不盡精忠  
報留與佳孫翊 聖明

其二

庭樹成陰鳥下墀公餘隱几日哦詩清時斂却彌綸  
手漫試尋常月露詞

南山之麓

南山之麓北迤蜿蜒其下有區寒泉出焉我來作室

杙杙其椽爰居爰處維以永年  
園之幽幽枝條其樛庭之窄窄亦有杞枸人言已陋  
我謂寡仇云誰之思洛社封丘  
威儀秩秩飲食衍衍各率乃職維安厥分終和且平  
福由天申先民有訓治已治人

谷雲和陶淵明停雲

萋萋谷雲以陰以雨嗟我懷人路脩且阻豈曰無琴  
伊誰與撫掇彼幽蘭悵望翹佇  
萋萋谷雲崇朝其濛嗟我懷人隔以一江泛彼輕舸  
過我軒牕薄言招招可以往從

心乎澹泊壹乃枯榮有時流憇以舒幽情川有游泳  
岸有邁征我獨處此不見友生  
翼翼歸禽集彼庭柯載遷載止下上其和自我定居  
所獲良多念及于子喟如之何

嘉木和陶淵明停雲

采采嘉木祁祁靈雨我栽我園云莫我阻逝其有華  
載嗅且撫爰策扶老日夕延佇  
其霞其霧其蒸濛濛酤焉有壚釣焉有江于以賞之  
于彼西牕雜珮瓊玖誰其我從  
淑氣載扇羣芳競榮匪伊爲悅逝各愉情瞻彼日月

悠悠其征靡心功化功化自生

有翮者禽言止于柯載其春聲相切而和琴瑟匪御  
樂意孔多人言遺安舍此云何

樂彼之室送內弟李稚浩激按察海西

樂彼之室爰有琴書載嘯載詠忽若無娛之子于征  
逝懷我居懷焉昔者朝夕造廬

我性寡合世莫我珍子今好我匪直懿親有不在側  
怒如無人庶其同心敢曰有鄰

相期暮途惟善孜孜進退憂樂與子偕之子出西藩  
四牡其詩我獨滯此曷不勞思

悠悠旆翻蕭蕭馬鳴摠厥綱要勿親碎零有不自斷

驛聞于京 王事靡盬其敢遑寧

咸興樂民樓

立馬咸州萬井東青黃野色欲秋風天低平楚迷茫  
外人渡長橋夕照中開國山河元氣壯鎮邊樓堞伯  
圖雄昇平 王化知遐被十里邨煙蘸碧空

利城侍中臺

侍中臺上久彷徨閒傍魚龍擊劒長礙日千松藏斷  
壑衝波百丈吐孤岡元山指點烏頭黑歧島迷茫鴈  
背蒼大樹飄零千載後書生匹馬騁文章

南兵馬營

表裏山河勝西南節制權控弦氓什伍列壘梁三千  
劍外烽傳夕兵前浪疊天秋高元帥壁閒閱練軍編  
城津敬文先君子板上韻

何年持斧過城津石底重聞鼙鼓嗔渾渾天隨高浪  
轉滄滄日與女牆隣魚龍繞柵晨聽柝虎豹藏山夜  
守闔獻策無功人已老空教海鳥自鳴春

李夢瑞獻慶謫慶源寄詩依韻答之

征鞭共指豆江隈君已先吾二日來柳惠固知三黜  
義賈生何屈六嘆才雲垂石磧歸鴻惡風滿蘆花竄

鹿哀休說 北宸天外隔城頭自有望鄉臺

次李深遠惟秀寄示韻

天涯流落寄孤邨歎息吾行過鬼門歸夢每驚賓鴈  
曉旅愁偏入戍鴉昏身惟德裕分爭罪心愧唐生切  
直言塞北山川看欲遍好酬蓬矢亦 君恩

次鄭孝善述祿讀易韻

少年讀易不知裁昨夜吾方覩得來星月高懸三極  
象山河昭揭六爻材流行天道唯伸屈經緯人情只  
樂哀尋水窮源應一處莫須馳走萬川隈

夢見亡女感懷

郊西孤墳會三過  
父女情懷兩不知  
如何今夜天涯  
夢女在父傍  
均粉脂霜風忽起  
塞鴻聲布被覺冷  
淚交頤前年欲作汝  
銘辭世故纏仍尚  
遲遲客堂秋深夜  
寂寥正好濡筆抽  
哀思汝母又在千里外  
更憑何人知汝私

七寶山金藏寺

倦馬嘶空谷  
筍輿度細川  
禪扉山寂寂  
雲碓水涓涓  
喬木偏高地  
幽禽自性天  
真源藏不得  
名在世間傳  
望海峯

高峯絕頂忽平原  
東望虛寬是海門  
洞澈雲端多氣

色蒼茫山外一乾坤  
頭臨瑞旭天光近  
身御冷風地步尊  
秦帝城邊曾立馬  
十年重眺八荒垠

次題北妓彩心詩軸

并序

余爲北關御史廉知姜昌起  
冤死事爲之伸理後九年  
癸未余自謫放還巡使李聖方  
爲設絃歌於知樂亭座上  
有說昌起事者語未竟小妓彩心者  
年纔十三忽以袖掩面而泣  
問之則昌起女也滿座悽然爲之  
停樂李丈以爲此事甚奇不可無識  
卽賦一絕令余和之

十載重尋杖杜原  
白頭吾忘理民冤  
娼家亦有根心

孝倚瑟千行泣舊恩

楊門途中

吾行知近峽山勢何嵯峩鳴泉瀉叢薄漁梁傍人家  
黃雲遶邨逕白犢下山坡饑婦戴筐立凝視行人過  
心隨境與靜歸當守丘阿

皇壇親享敬和 肅廟感懷詩韻 并序

甲申 上將親享大報壇以是年即皇朝革世之年  
而享日用 毅皇殉社之三月十九日禮儀既具相  
臣奏十九日於 毅皇為忌辰禮當去樂 上召禮  
官儒臣問之禮曹叅判臣徐命膺對曰禮樂不備不

可以祭况十九日在 毅皇則忌辰在 高皇 神

皇則非忌辰豈可為子孫忌辰去樂於先代正祭乎  
抑臣所疑則有之三代正祭天神卜辛地示卜甲戌  
人神卜丁亥皇壇本以祭天之禮祭 天子則宜叅  
用祭天祭天子之禮而今祭日皆違此干支恐於禮  
不便也然今期日已迫不可通變臣偶考曆書二十  
日干支為辛若於十九日詣壇省牲以伸追感忌辰  
之情二十日設樂行祀以遵卜日正祭之文則既得  
禮意且不妨用樂也 上曰善於是樂成禮備與祭  
者皆愀然有神州之感



壇祀猶聞 八耄親百年東土返王春黃鍾想像周  
丘降王戚依倚夏廟陳雲暗山巒香覆幕星垂袞冕  
淚盈巾辛逢忌後知天意無憾吾 君志事遵

喜雨應製

霖霖通宵驗有年官人催駕稅桑田千旗低濕平蕪  
外萬耦環瞻淡靄邊麥壠分青涵雨露秧堤洗綠占  
風煙 王謙不有知誰賜穆穆歸之 陟降天

海春君林挽二首

咸平肖子檜原孫今代宗英屬望尊欲識從來為善  
報朝回棣萼爛盈門

其二

遊公伯季九回春三見佳城草色新獨有伶俜難弟  
在白頭求挽淚盈巾

金知事鎮東挽

第祿人間數有全公於平地即神仙班聯八座皆天  
得養足專城以子賢一夜星輝沉別館百年元氣返  
秋阡阿郎叔季心期在縱未承顏亦愴然

陵幸時病闕祇迎禮感書長句

鷺鼓三聲起炬煙十官跼注兩行前龍旗曉拂扶桑  
日鶴駕宵嚴雨露天松柏風清凝 孝思蘋蘩流潔

示心傳獨憐病滯微臣在誠禮空拋輦路邊

寄家兒浩修謫所

兒投炎瘴地翁返水雲廬祇爲憂治世初非博令譽  
林霏烏反哺簾雨燕窺書却歎吾衰甚離懷忽悄如

夜雨

孤燈牕下暈驟雨澗邊過聲入梧桐颯涼歸枕簟多  
潭心添碧藻洞口長青蘿洞洞清無寐明朝看藥坡  
閒居書事三首

久疑居道觀但未却腥葷漁艇乘潮入樵歌隔里聞  
坐看雲自去行訪水將分時與田翁遇農談到日曛

其二

漸釋經營志偏知日晷長臨溪時倚杖掃石獨焚香  
白鳥窺田立玄禽掠水忙身疲返精舍經卷自橫床

其三

老喜幽棲穩孤眠到日高荷珠知夜雨松韻問潮濤  
不有違心事誰成避世豪邇來身計定故是聽雞曹  
雨不止

踈踈還密密欲霽更浮空邨靜牛羊夕天低燕雀風  
孤蓬明滅外亂畝有無中盡日燒香坐相看但菊叢  
叢竹

白露秋將近蒼竿意更豪聲傳風外韻影到月中高  
凜凜高標迥亭亭俗慮逃琴書牕下在清趣兩相遭

白蓮

綽約山牕下瓊葩一鑑泓月來逾淡泊露裛更神精  
落葉仙舟泛翻荷羽蓋傾最憐中夜枕微送遠香清

月桂

為愛檀心久移栽近牖前根分茅殿植華自桂宮傳  
紅雨潮歸日青春土旺天羲和休宅四野外亦知年  
亦知

亦知時不再其奈技無能憂世同嫠婦偷閒似定僧

行藏前輩愧文字後生稱遲暮蒔栽業都因漫興乘

送家弟繼仲命善謫濟州

舟纜江天馬踏晨相看華髮弟兄新曾悲關嶺二年  
謫又送滄波萬里身鴻鴈影分平野色鶴鴿飛惡亂  
山春君還莫歎無歸處亦有吾廬遠世塵

白頭山詩用韓文公南山詩韻

葱嶺盤西極中州此其囿五嶽不敢秩千山浩難究  
綿延沙漠外一脈吾東授吾東有白山名從禹貢漏  
穹然立大荒世人嗟未覩柴望初不及輜車何曾湊  
惟有不咸稱僅一傳梓繡 寧壬辰歲線路始得

透一路西由甲一路東由茂穿過萬木叢歷盡千仞  
岫及至虛項嶺蕩蕩路始就遙望天之北白鳥將舉  
噶征夫舉鞭示此乃白山秀漸如雲發絮條若槽出  
耐行行近山底瓷甕相銜覆皇矣造化功此地壯結  
構崑崙豈獨大廬阜還覺瘦應讓此山勢窿然撐穹  
宙人或見脊背謂言少雕鏤大匠晦神變雄都茫延  
袤吾行知已高六月凜寒候沙斷猛虎迹峯絕飛鳥  
遙但見皚皚冰留在山之戊仰脅登絕頂頂上忽成  
竇於中有大澤北出如齒漱雲夢煙初收洞庭綠新  
糝人言或高聲雷聲起白晝所恨無雲梯不敢下濯

漚祁祁熊麋羣跳躍如猿狖復有一雙禽點水終不  
仆三峯起澤畔黃金色反陋獅子與望吼稱名何其  
富上似舌之吐下似駝之走遂環十二峯攢簇勢不  
宥或疑羅寶貝商賈立爭售或疑列琮璜禱祀祈冥  
祐又若將倚劒顧視僕夫諾得非閩風城無乃丹井  
甃紅碧爛塗抹久視神欲愁奇觀每易新塵慮摠失  
舊移步大角巔鏡湖迎人又此中有神物傳言巨蚌  
罍若道多靈異何不防胡寇回顧天四際山偃雲來  
救聳則劒盤束聚則鳥殼殼忽如萬馬馳明光捷書  
奏北望寧古界朔風何貿貿天運本互嬗神器亦邂

迤西指杳靄間醫閭山之脰我欲窮遠眺其柰目眩  
瞽滄海何處是片白如垂溜應被山峙隔豁處往而  
復欲向已峯觀翻身轉至右巖巖彼寶多實爲此山  
胄羣巒列在傍仙女珮容臭東南依輦巖象以屬車  
副大能藏龍蛇小不遺颺颺山下千萬川皆從山上  
皺孤高出半空煙雲不敢鬪雖然視白山鳳飛與雉  
雉其下出一榦遙馳東南轉緩若長蛇勢急若羽騎  
驟乃開漢之宅萬襪天所佑自餘羣山尖列如艾注  
灸化工初開闢大地寫篆籀真意點點留精神畫畫  
逗不然農丈人下界恣耕耨惟茲一幅畫生平何處

購勿言多參差造化生誼譎物固分剛柔人亦有長  
幼君子所以名爲是世多謬凝坐細評品殆若數釘  
餌萬象本前定何待蓋其枢念罷下山腰沙堤屯若  
桓蹲蹲緣崖谷往往逢異獸想彼山下人我爲鷹  
鷲臙峯一回首銀山立在後餘懷殊未已恨不仍宿  
留言尋定界碑憶會講和媾堪恥兩使臣出入胡雛  
袖茫茫七百里任彼碧眼狩犯界氓何辜蹙疆罪有  
首追思氣填臆勃勃若饋餽思之可奈何節屐催回  
收行至三池島箇箇如偃殼邦家有祀典何不此薪  
禱欲言不在職徒誦萃二絲高听望若支深水俯如

妬盡日降復登杉木處處遘夜臥樺屋下可摘北斗  
宿前吾誰飲馬路傍委槽廐蚤作披霧露日出光瑩  
琇蟠根臥中達遠見疑屋雷三宿始見鶯近人如相  
狃自我觀白山始知德之懋巨浸難見底豐肉不見  
腠聖人氣象渾不勸民自侑欲窮此山蘊幾多費勞  
疚况當風雲變靈怪若符呪元氣所停蓄豈假襲而  
傲前時薦我文會為神降嗅鋪張作此詩庶幾壯觀  
酌

白頭山歸路得黃良伯最彥寄詩次韻答之

十載三脂北上轅揚鞭今向白頭奔河山鰈域開宗

祖分野燕雲列仲昆蠟屐成三曾有約行裝少一倍  
傷魂荒原片石君休問憤切當年蹙塞垣

次題青蘿亭二首

吟罷青蘿八百莫尚書珍重又名亭歸歟三逕知何  
處邈矣千巖宛在庭風卷市聲成壑籟月籠喬木散  
蚪形東山我有盤空韻早晚携君試一聽

其二

一退心常在孤亭意更多吏趨疑府署客散是雲蘿  
疎樹容山入飛簷為月過江湖秋已晚歸夢問如何

金副提學時聚挽并序

通政大夫弘文館副提學安東金公卒之明年正月  
二十日葬于青陽縣里負壬之原民曰惜也善人去  
矣士曰嗟夫直道藏矣朝之薦紳大夫曰已焉哉風  
猷不復可考矣於是達城徐命膺道其有感於古者  
以相其紼曰

自古聖明朝必有諫諍臣賈生哭漢文唐介憂宋仁  
長沙及忠州去作放逐人吾聞物之萬受變方爲真  
所以風霜悴必後艷陽春始焉體天意二君實同倫  
如何成就功參差反不均一爲變理臣一爲落拓身  
青燈照古史志士掩卷頻若謂異遭逢同是昭明辰

若謂由命數亦有造化因茫茫此一理天高不敢詢

讀書和陶淵明形影神三首

短髮垂兩鬢匪復咿唔時爲憐中田荒殘年欲理之  
方秋葉歸根物性常如茲富有非吾事身踐是所期  
誰爲示大道伊昔孔子思但使心日休外物奚戚泐  
庶幾返自然天命靡所疑頗恨少壯日光陰費文辭

其二

上士學之力下士修以拙但得志善多茲道不中絕  
先師有遺訓時習乃能悅何必歎衰邁爲之當自別  
前時謬外求恥或名湮滅不知軀殼內冰炭交冷熱

幸今謝榮辱仁義庶自竭方之托神仙今古誰優劣

其三

宇內皆吾道熙熙上下著人不見其然私意隔之故  
俯仰勞精思衆理自來附曷不反而求作止與默語  
古今事成敗知在人所處譬之川祛壅沛然誰能住  
惟仁吾自力其餘皆有數豈爲尺寸膚還忘性所具  
一時能強忍千載遂今譽善惡皆有幾來來復去去  
嗟哉吾黨士端居亦戒懼微言載簡策爲此萬世慮

和陶淵明九日閒居

閒居逢節序意若爲吾生景物皆可怡俯仰稱其名

滌滌場圃潔淡淡山川明籬下秀孤叢木末生寒聲  
登高興已淺吾衰歎暮齡獨坐茅齋裏濁醪聊自傾  
此間真意足不羨身外榮義農雖云遠至今有餘情  
君看馳車者白首竟何成

歸山三首

歸山歲或三今歸始歸山上疏告歸休歸以知非年  
時當晚潦餘處處草交淵小驢隨二童逶迤道中田  
行登巖巖望我家垂柳間荷葉欲綻房竹孫已參前  
父老迎問語山厨起炊煙鄰雞過墻頭堂鷺止牕顛  
坐來日且半如何事事閒從前多取必而今付自然



其二

蚤起庭宇靜雨過樹影稀白鳥東南去片雲何處歸  
微行草多露步步蹇攝衣求閒乃得閒人願天不違

其三

樂以觀景物景物皆我娛鳴泉出叢薄孤煙度曲墟  
衆星低江岫粲粲插人居舉目依微圓高原樹一株  
幽獨坐東牕琴書渾自如在昔匪少此於今意有餘  
天機淺嗜好莊生語不虛但恐此時趣終老保得無

補甲山府使和陶淵明示三郎

古來出世者多憂恒少欣坡爲百謫身惠作三黜人

以我戇愚性免此何所因荒莽窮髮地轍跡頻年臻  
皮衣多熟面方言已慣聞奔走胥歡迎爲禮誠殷勤  
聖化方暨遠邊塵不起鄰猶見吏來稟冰合鴨江濱

甲山官舍次梁鳳周韻二首

欲知人事摠由天看取吾行躔後前避世忽尋遷客  
路乞休還占使君筵雲端一點煙塵靜 宸北三更  
夢寐牽多愧平生無定力強將尊酒慰悽然

其二

客睡尋常到五更起看銀漢欲西傾簾垂積雪千山  
色燈剪寒梅一笛聲懷土愁因佳節倍思 君淚入

靜時生絃歌誰道宣幽鬱聽罷絃歌亦愴情

夷山雜詠八首

夷山山似上天難歎息於今幾往還縱使此生能百  
歲光陰強半道途間

其二

參天杉木簇如檣鳥道逶迤一線長山外有山疑抵  
極忽開平地着城隍

其三

樺屋荒蕪木柵疎煙生方覺是人居大抵窮山民俗  
質孤邨未始設門閭

其四

傳呼林外使君來兩片青旗挾路開繩笠狗衣轎下  
滿生涯說去聽堪哀

其五

嗚嗚畫角早開衙被褐軍官拜以差小吏趨陳民有  
訟貂牛輕重乞明查

其六

五月山巔種耳蕘初秋霜降薄言收可憐塞土艱生  
理一斛春來不滿篝

其七

魚鹽終歲未登盤富戶方能蓄豉鮑若使馮驩來作  
客匣中長缺不勝彈

其八

獵客平明穿雪中  
豳風誰識獻于公  
都緣府鎮徵求甚  
情志會無上下通

甲山貶所伏奉讀書錄

御賜

初收吟澤淚忽奉白天香  
宣綉風雲合開函日月光  
事應傳紫塞禮實始黃堂  
誰道編摩技尚紆寵眷長

次梁南二客登南樓韻

莫上南樓望鄉思  
正斷腸旅人猶紫塞  
節序已青陽

天闊雲來遠山長  
鳥去忙松醪宜客抱  
一竿爲君揚  
自甲山承召將歸次梁南二客韻三首

太守歸將近邀賓日  
賦詩小爐煙歇後  
高閣月來時

其二

虎符交有日雀訟聚如期  
每道須新尹小民如不知

其三

數編先後易整束在床西  
試問吾行李何如琴鶴携  
丁巳夏陪先君子至元山  
交濟倉落成仍爲海  
獵之遊後三十二年自甲山貶所召還過之  
敬文板上韻

斯干歌罷泛樓船三十光陰過隙然此日軒前來駐  
馬當時听上望如仙滄波萬里通仁澤煙火千家足  
惠鮮迸淚幽吟成久立斜陽回照海門天

山家樂六首

未老乞身世笑不才耕野心安須知當去即去莫問  
是難非難

其二

疏傳云何事業季鷹有底彌綸祗緣一退媿節遂作  
千秋達人

其三

桃花灼灼深巷芳草離離遠邨一片漁舟繫听不知  
是否仙源

其四

垂柳白鳥黃鳥隔林晴鳩雨鳩鳴春不競春色更覺  
山居轉幽

其五

野性渾忘拘束春眠每到日晞臥聽牕間女語折來  
園蕨盈衣

其六

一張琴携響月數首詩詠臨風已向物外心靜不妨

塵間耳聾

金叅判 善行 挽二首

風流文采早聞聲春塢東頭始識荆的的談鋒驚四座  
座凌凌氣听壓羣英卅年離合青眸在半世功名白髮明  
一臥江邨消息斷薤歌此日淚沾纓

其二

朝端六七我同年公以剛強逝最先可惜青萍埋厚夜  
不堪丹旆送寒天 重宸契密萋菲後八座班高步武前  
筵几祗應歸杏浦精神好返舊遊阡

幽居書事二首

尋常處世時遇事多戲魔歸來理園木甘雨忽滂沱  
知應吾經濟但可宜山家從今除妄想安分守丘阿

其二

如何陸內相在家抄藥方計已醫國非心猶壽民長  
我今疏草木本為聞見廣雖然千載上陸相應撫掌

余方述鳥獸草木疏

文韓文公謝鄭羣贈簞韻寄仙槎守成大中

仙槎苞竹世共知作笛不奇作簞奇太守前年欣得之  
緘封寄我碧琉璃鋪來山家動光彩恨未藏節多瑕疵  
揮毫更求滑澤美謂言長歌吾當為尋吾北出

伊聯齋集 卷一  
已忘言况君南遊久野炊今年赫炎昔所稀矮屋坐  
臥俱不宜汗膚思得水紋襯家人每道箱無資忽聞  
鞞筒自海湄撥置中堂何漪漪翱翔不下彼蚊蠅匝  
還驚看諸童兒銀床露帳渾無色一陣翻嫌林外吹  
從今午睡足山牕何畏烈烈入簷曦雖然匪爲一雙  
簞感君誠信久不衰

浩歌行

使我常在聲利場文章豈能辨精麤使我未忘得失  
念先天豈能窺有無排置花木足悅目整頓室廬可  
安軀清風明月自不貧臨水登山輒命壺邇來復學

參同術金丹消息問鼎爐功成若活數百年堪向仙  
家膺籙圖人生凡事一聽天世間何物不自娛

永保亭凌虛閣文浩修韻

欲識凌虛意須看欹枕邊潮生楹自泛月轉閣疑旋  
天地斯爲大風塵亦有仙腐儒來作主萬事定前緣

永保亭次杜工部園樹八韻

眈眈千隊擁松株節制風煙似此無水霧卷時遙嶼  
出山形斷處大河紆城排獸角迤迤側舟畫龍鱗色  
色殊寥廓海門風氣烈嶙峋石齒雨聲枯乾坤始覺  
軒而大日月平看死復蘇奔走鯨鮫歸控禦指揮鴟

仁職齋集 卷一  
鵲備疎虞地爲水路三分據勢則邦家一面扶散袞  
投壺元將略名亭故在女墻隅

李叅奉命輿挽

南北多年想典刑樓船泊處是鱣庭如何白露蒹葭  
外一點光微處士星

君臣同會一堂中十韻應製

上林秋色醉丹楓不辨仙桃滿地紅璜珮聲高金殿  
裏獸爐煙細錦筵東佳辰古重千秋節寶曆今回  
八耄隆是日祥輝三殿合每年華祝萬方同淵  
衷常在謙光執衆志要憑晉接通濟濟成行西掖外

蹠蹠引步內庭中珠簾影動簾前日王座香聞殿角  
風造化功涵三世遇風雲契驗一堂融偶符舜殿賡  
歌會况值堯天雨露豐莫道賀儀猶未舉盈庭暗祝  
壽齊嵩

安市城

攢簇金城固崢嶸劔閣深窮兵千古戒衛社百年心  
往跡沉寒水高名峙碧岑吾生多感慨駐馬一長吟

寧遠行

寧遠之城多砲穴寧遠之山名嘔血問之土人何因  
爾土人不敢分明說皇朝陪臣好述古欲言此事先

悽切伊昔桓桓袁大夫爲國屏翰來仗鉞曾中萬甲  
自無敵車後千卷况濟術虜騎一夕滿城闐端坐元  
戎色不奪神機深藏鬼莫測傍人但道謀計拙忽然  
一聲震天雷無數紅林飄烈烈軍威大振北徼外建  
兵不復西向列 天子曰嘉來汝煥鎮茲山海邦之  
臬兵謀十三間爲上陳金走處范疽發滿洲鈔幣入  
東華崇煥死日明運訖大抵殺人交其子求諸利害  
亦爲失街童三尺尚知此會謂袁智不之察錢氏之  
子豎儒耳詩譏文訕皆曲筆和戎殺毛自有意事半  
成時難容舌論人當先志與才何論東林跡有別千

秋共稱武穆冤賴有朱張昭其節惜哉袁公身世屯  
生前死後俱昧黜我今作歌歌是非留與青簡名不  
滅

曉發兩水河

雞唱疑吾土厨語覺異國攬衣數問星吹角催戒僕  
出門路茫茫東西靡所適朔風何凜烈時卷黃沙撲  
豈不懷安逸奈此 王事亟邇來鏡裏霜太半由行  
役况今病新瘳垂垂如許白明年竣事還會歸吾廬  
息應與妻兒坐疊疊話宿昔

榛子店

并序



壬戌冬金息庵錫曾以冬至上使過榛子店見壁上  
有題曰椎髻空憐昔日粧征裙換盡越羅裳爺孃生  
死知何處痛殺春風上瀋陽又曰奴江右虞尚鄉秀  
才妻夫被戮奴被擄今爲王章京所買戊午正月廿  
一日灑淚拂壁書此惟望天下有心人見此憐而見  
拯又曰奴年二十有一缺三字秀才女也母李氏遂  
終之以季文蘭書息庵問故於主媪主媪具言五六  
年前瀋陽王章京用白金七十買此女過此悲楚黯  
慘之中姿態尚嬌艷動人垂淚書此右手稍倦則以  
左手執筆疾書云云其說具在集中吾東能詩士往

往相屬爲詩今吾輩過榛店問此事已無人識之者  
乃知從古怨婦羈女隻字片句一遇文人流傳於後  
者亦有幸不幸也遂與副价行臺和之  
嬌花勁竹各冬春才貌難兼節義真一死從來唯在  
已不關天下有心人

石鼓歌

石鼓石鼓周宣鼓鍾鼓云乎鼎彝伍中興車馬耀岐  
蒐皇哉乾坤再黻黼雲根斲來作旂常銘以豐功繼  
文武石鼓石鼓吉甫詩文莫吾徵誰則知車攻吉日  
好文章大抵多是一人詞何況清風起苔面一巒猶

知全鼎滋石鼓石鼓史籀篆鳥跡太深科斗淺藤蘿  
側畔露枝柯觴豆中間辨瑚璉自從羲皇六書後此  
體書家視冠冕於乎石鼓豈凡鼓天地精英爾獨將  
飄流八萬大世界閱歷三千久星霜狂秦斧斤已謹  
避邨婦杵春不須妨棲棲天下縱失所十鼓相隨無  
一亡何人欲寘上庠廡歌者韓公勸者張雄詞豈但  
一時振至言終爲後來昌一一收載橐駝背天球河  
圖廟門傍五代風雨劇茫蕩暴君不敢翻污傷宋人  
欲防字剝落填以黃金色煌煌從來真寶世莫知阿  
誰剔出賒糶糧明初三百廿五字祇今存者唯半強

沉淪纔脫草泥阨刻缺還因搨摹戕名聲萬口自不  
閒品題紛紛翰墨場清高韋生世代錯博雅歐九疑  
信長周詩不編又一案誰識聖人微意藏省文互見  
乃經體我馬旣同寧累章吾生好古久成癖手持鼓  
文幾商量會從國學教多士一篇謾試明倫堂而今  
偶然充上价殊異吳季觀魯鄉費庭垂紳拜尼父摩  
挲石鼓仍彷徨石鼓石鼓豈論世千秋幸依夫子墻

燕館新歲與副价行臺同賦二首

吾土流光易殊邦歲月遲雪花迷去路柳絮香歸時  
異籍從胡貨方言問譯知每聽簾外語疑得報咨期

其二

途中思館穀館穀又思途午睡書籤散宵吟燭影孤  
序班穿壁語提督入門呼一誦皇華集吾生續此無

清節祠次副价洪養之梓韻

我馬虺隤我僕病猶從便道謁清聖始知聖亦地之  
靈山自壁立水如鏡今去二子幾千年吹袂清風翛  
翛永逃荆秦伯倡道先觀周季子覲德盛扶天大義  
寄七尺獨也堂堂孤竹勁豐碑不文文孔訓可見華  
士識趣爰求仁得仁此心法賴吾夫子日月競壁上  
縱橫是誰題徒亂江山皜皜淨俯仰默想不忍去斜

陽在岫禽語定

清節祠再次副价韻

為拜清祠率彼濱天時偶值葳蕤春孤山屹立扶綱  
義滙水流舍讓國仁環廟碑多先聖訓入門松淨薄  
夫塵首陽元在吾邦內知者千秋但一人唐李渤記云高麗海

州有首陽山乃伯夷叔齊  
隱處有與箕子往來之跡

勵志三首

幾年迷道走此日悔心萌回步雖云晚猶賢誤一生

其二

事過方知錯言終乃覺非因循度時日鬢髮已如絲

其三

獨立寧羞影孤眠勿愧衾生平喜誦此空自負初心

以冢宰遣召補忠州次東軒板上韻

魂歸京國不知勞殘夢頻驚繞社濤受牧每慙前聖  
訓辭樞敢擬古人高風簷日課簽丁訴水站時催載  
稅舫到老丹衷綠 聖主祇今未作避人豪

賓僚行

賓僚曉捲青布帳方丈美羞皆宮樣綾被向來幾殫  
誠恩波是日浩莫量藏修之終必游息文武弛張不  
我誑文武弛張不我誑摠由 睿學日向上上探漢

初石渠貯中搜唐宗內庫藏非徒好之又無數朝經  
暮史課以兩离筵講畢紫陽史國初唯有 二聖倡  
三百年間繼述業 邸下昨歲始推廣 天顏一夕  
喜氣溢寵錫便蕃示嘉尚遂令膳人具需雲來汝賓  
僚同 君貺鏗鏘短律唱且酬言志寓戒俱跌宕皇  
朝續編亦云富是歲講畢復如嚮銅闡典學自古今  
此事臣誠聞之初前年一筵卽盛事外史記之人皆  
仰况今 睿業更進步昔者殊禮今何曠紛紛成行  
各醉德不待香醪沃肺臟天氣下降地氣升春風初  
煽物亦盎洋洋禮樂雖峻極俯仰只是畫此狀大抵

為國以禮樂要道得之自 主鬯翻嫌聲律局情志  
變作長句導宣暢柏梁臺咏多氣岸醉學士歌近豪  
放豈若此什却雍容暨彼喜起相揖讓關雎鹿鳴豈  
非燕私詩竟登風雅第一唱

梅下校勘啓蒙

一部先天一朶梅爐香起處伴床開莫教人力催花  
拆妬復分明自往來

敬和 御製清明詩韻

清明不清明是以號清明潤物花成繡噓仁草遍垌

山居雜詠二首

多少從前遭值艱靜思如在夢中看危疑漸覺無名  
好閱歷方知處事難身後題評書數部眼前怡悅象  
千般他年石室誰為傳文苑名卿兩不安

其二

暮年看史逐兒孫百代興亡過目繁無乃斧柯天上  
爛忽如碁局卷中翻榮枯寂寂渾無影善惡悠悠尚  
有痕往事何關千載後一回悲慨一回欣

敬次 王世孫示賓僚韻 并序

癸巳秋八月 王世孫邸下講畢紫陽綱目盖國朝  
唯 世宗大王潛邸時講畢綱目而自是厥後豈有

聞焉式至 邸下克繼其事 聖心嘉悅是有賜與  
邸下召賓僚侈需雲親賦四韻令各和進噫甚盛也  
然臣嘗聞 世宗大王嘗於經筵講律呂新書即命  
求律制樂此可見 聖人知得一寸行得一寸之盛  
意 邸下之法 聖祖正在於此而不徒以多聞博  
識為足以盡繼述也敢以是仰勉云  
開熱塵編歲易侵三朝暇日盡推尋徽規 英廟會  
超古盛事离筵復見今較量功程徒述跡修明禮樂  
始傳心新書講後旋求律到此方知 睿學深

敬謝 王世孫賜新薑兼侈 手札

珍賜初攀 貳極仁春葵夜雨伴芽新調羹肯數梅  
鹽美入藥能通佐使神草木猶親辛辣性賓僚寧厭  
直方臣尋常細事追 前烈庸謹元來造聖人

留別箕城士民 并序

不佞今將歸矣鄉老直月與共導俗之政訓長齋任  
與共有才之政豈可無合席敘別之道乎遂與聯舟  
石湖亭試各齋接生於帆前溯洄至浮碧樓舟中吟  
成一篇分揭九三院日影齋以勗來效云

畫船橫繫大江潯鄉老儒冠繞席吟千里桑麻新雨  
露百年絃誦舊棠陰龜疇禹跡思回古蟋蟀唐風欲

變今經理未終先解去願君無負懇勤心

聖節禁中與奎章閣同寮呼韻各賦

曉趨虹渚節班近閣門深九五龍飛會三千虎拜心  
謾勞司卷酒共滌集仙襟勝事添文院年年泛菊斟  
奎章閣褒貶後入侍逍遙亭分韻應製

好雨由方寸名亭法酒清入簾皆爽氣繞檻盡川聲  
擺徑含風細岡巒鎖霧平搗文題品筆更課上林鶯  
洗馬臺親臨大閱敬和 聖製

君王臨細柳鼓角曉霜清聽誓風傳鐸連營日耀兵  
龍韜藏秘略虎旅舞歡情吉甫休騰頌 宸章驗太

平

吾生

吾生天賦大愚癡徒藉先麻好爵縻少日揣摩勞妄  
想暮年虛靜返真知梅牕朗月論心友雪榻寒燈講  
道師宿昔偶留仙府約赤松高躅會將追

偶吟

晚鍊丹三鼎如窺豹一斑心忘憂喜界身遠是非關  
夜靜天機轉晨清灑氣還唯餘著書業隨意不妨閒  
齋居謾詠二首

一室纔如斗猶堪着老身官高能遠世財少不憂貧

白髮風霜久黃芽歲月新殷勤會心友書卷與冰輪

其二

老人常夜寐朝起怕寒嚴積雪飄松塢脩冰落瓦簷  
爐殘茶熟火几散讀餘籤孤坐清無事旋將秃筆拈

和家兒澄修菊花詩韻三首

黃鶴翎

世人重黃菊爲是淵明栽栽之或紅白俗尚應嬾回  
從來物有名因人增崔嵬何況天地性黃中獨奇瓌  
日月相揮持戊己與胚胎所以歲寒天爛其盈門開  
名實物皆然智者乃能裁小子謹識之此理窮確墮

紅鶴翎

常疑山居訣紅菊勿近除謂言花燁燁奢華太有餘  
吾聞君子德爛若錦繡舒所貴委時命何必守泊如  
始覺爲此論大道見得疎秋來艷艷香爲近牕前畬  
恰似金葩名元亮是吹噓萬事有遭遇悠悠者毀譽

醉楊妃

花固有雌雄阿誰名以妃名妃且不可楊妃豈女徽  
乃知命名意但取香馥馥久爾受污名天然不露機  
還如成德者不愠世人非吾兒惜此花嘉名表清輝  
發爲篇章富一一語入微從今醉處士庶免羣葩譏



保晚齋集卷第一終

保晚齋集卷第二目

詩

題畫四首

齋居漫興五首

賜號保晚齋歌

詩準

釋命

詠白香山

讀老子

月蝕詩

次韓文公秋懷詩韻十一首

題東坡草書醉翁亭記後

三大隱詩

嚴君平

嚴子陵

陶淵明

峒嶼碑歌

文章仙歌

和陳子昂感遇詩韻三十六首 并序

對雨書事

讀梓人傳

讀鍾離權事實

敬和 御賜國朝寶鑑纂輯廳詩韻

奎章閣春帖子二首

奎章閣延祥詩六首

燕雲歌送冬至上副使 并序

西遊詩 并序

庭列八歌

謙歌

讀道經

自嘲

大成行

敬和 御賜瀋陽使李右相 福源 詩韻

獨酌書事

燒香

敬次 御賜鶴城君几杖宴詩韻

放言九首

處世

六言

一碧亭吟示孫有本

觀漲與有本分韻二首

龍山精舍八詠

涵碧亭

披襟岡

聚勝寮

迎灝榭

仰天池

倚欄塢

繞秋畦

煖春園

遣興

敬和 御賜家弟判府事周甲詩韻

次東坡梅花詩三疊韻

乙巳除夕與兒澄修孫有桀守歲用江韻各賦  
卽事

初夏與孫有桀分韻二首

次杜工部遣興詩韻五首

江居樂四首

卽事

丙午除夕書懷

丁未元朝三首

江湖

雜詩三首

休言

漫興

丁未五月十五日夜夢作

保晚齋集卷第二

達城徐命膺君受著

詩

題畫四首

傳神千古事幽意默相通巖際孤雲出橋邊獨樹籠  
鳥飛平楚外人語夕陽中無乃虎溪是塵心頃刻融

其二

幽人出未歸童子不關扉春水桃花暖晴天柳絮飛  
半牕黃卷靜一逕綠苔微洞外村煙起漁舟果得揮

其三

兩行山木直一曲澗流懸枕石雲爲幕携壺草代筵  
紫芝商皓問丹竈葛翁傳自笑塵緣重何由共說玄

其四

危石嵯峨立柴門逐水開江天何寂歷沙岸自縈回  
人度長橋去鷗隨遠帆來雲容方淡蕩山雨欲相催

齋居漫興五首

年當歐九懸車歲官比希文致政時雖愧前人名德  
盛猶將一節願同歸

其二

斷置曾中利與名人間歲月覺崢嶸張良辟穀成何

事李泌多書樂此生

其三

床頭周易晚窺門朝夕談玄有二孫不待君平吾已  
悟須知卽事是貞元

其四

一生禮樂費精神畢竟都無入用辰自笑光陰虛度  
了稗官小說老來親

其五

機關平日絕根源非曰能之至戒存陳平六出雖公  
正猶悔陰謀少子孫

賜號保晚齋歌

阿兒言從紫闥歸恭敷 至尊鄭重辭保晚嘉號今  
肇錫往揭卿父齋之楣卿父名節到老全約略數之  
有三奇老臣聽罷起拜受感極而涕涕漣漣自從立  
朝三十年環顧言行多忸怩飄然白髮每自傷將何  
他日報嚴慈一朝華袞忽踰袞居然名節無瑕疵遂  
令半生散樗質變作大冬寒松姿諄諄 天語蔽本  
末史官在傍大書之千秋應識今後臣誰復苛追從  
前痴乃知乾坤造化功成物即成無留時君不聞宋  
賜希夷先生號朝臣承寵始於斯

詩準

古今長句誰最奇杜史李仙邈難追以文為詩韓子  
短因俗成章白氏疵楊公萬里又一格雕鏤反與天  
真離我今脫略諸家法性情之體自命詩君看風雅  
三百篇盡是當時道志思詩成始辨賦比興篇就方  
被金石絲何嘗把筆費吟哦擬作某調某曲詞鏡花  
水月盛三唐漢初作者不如斯學詩當學詩之本豈  
以世代懷遲疑吾詩準的在於此非曰能之乃所期

釋命

天命播萬類譬如風花轉或落在川渠或落在樓院

伊耶齋集卷二  
風匪教花落花自趁風便品題吾之命不爲凡人殿  
既超簪珥局又免襪襪賤生長世祿家所事唯筆硯  
雲衢平步進華廡歷颺遍時值門戶爭禍福俄頃變  
機關屢得脫鋒鏑偶不冒白首謝紅塵終始紆 聖  
眷所欠彌綸業多愧邦之彥雖然古來賢優劣等人  
面世豈皆子產亦豈盡蘧瑗幸吾不當事是非兩不  
見莫歎千載名寂寥青史卷得譽吾何知撫迹人空  
羨身後齒牙餘不敵一飲宴

詠白香山

我愛白香山完名唐代臣時當牛李爭獨免風波淪

晚節辦一退詩酒樂餘春世或各逃禪逃禪乃庇身  
張良願從仙李泌好談真欲使心有寓不復戀紅塵  
香山亦此意豈必惑正因假令惑正因何如醉夢人

讀老子

少小學未成不讀非聖書老年讀老子何其味有餘  
道在水善下利物不自居非唯人忌免亦使鬼猜紓  
相彼地山豕三才此爲魚從今反吾身以謙爲菑畬  
人疑下喬木我謂借隣鋤朱子闢異嚴猶向老氏譽  
况乃取人善吾道所權輿

月蝕詩



壬寅中秋夜二更月有蝕之金鼓初如菱鏡乍失  
圓忽似銅鉦半埋灰我時仰天不忍見閉戶却坐呼  
燈來乃讀玉川子月蝕詩又讀昌黎子月蝕詩二詩  
何多荒誕不經語令人神懣魄褫難爲思玉川故是  
詩人類其言無怪尚險崎昌黎自居孟子統孟子七  
篇何會有此辭藉曰托文以爲戲上天尊嚴敢侮之  
自從秦火六經後聖言漢初猶多遺淮南抵掌引迂  
怪列禦騁舌雜齊諧高高天象本難測二儒亂之轉  
益迷昌黎學孟不知天其曰所傳傳何斯我味元聖  
周髀書薄蝕之理恍然開日月平分地背面地隔中

間遮其曦所以月蝕常在望布籌歷歷推前期何況  
里差必由月蝕得益信地隔之說不我欺周衰疇人  
逃海外交食數法皆失宜孔子傷時作春秋據實直  
書其謬乖日食三倍漢儒說聖人書法會不知借問  
地隔又有數如何從古視爲灾譬如一方阻王化民  
情豈不皇皇哀擊鑑奏鼓諒由此非爲陰陽相盛衰  
悠悠上下二千年此理寂寞無人窺假令金蟆滿地  
大敢吞太陰晶晶輝三才之道本一貫能近取比遠  
可推招徠墨卿書牕下爲破騷壇謬悠疑

次韓文公秋懷詩韻十一首

中庭雜卉交其葉何薺薺大火光西流寒蛸鳴暫已  
今朝樹間聲颯颯又遡耳幽人感慨多撫念坐復起  
日月無停機物象隨以似况乃人易老強旺未足恃  
百年能幾許醉夢真同軌將何悟大道兩忘憂與喜

其二

天宇日以高地氣日以悴衰柳疎覆岸弊荷低垂地  
次彼羣飛鴈去去鳴聲恣從來士女情各隨春秋異  
四時保真樂吾道所以貴

其三

晝日何苦短夜刻何漸曼不成黍米大空憶胡麻飯

精誠若透金天必從人願常戒作輟頻無煩師友勸  
閒來展參同讀之周千萬壽已可壽民欲向 楓宸  
獻從前處世難厚招鄭默怨

其四

時節忽不淹撼撼復凌凌床減鍼膚蚤盤稀撲鼻蠅  
斗覺神思夷稍無耳目憎自從棲清真不復夢觚稜  
行將攜兒隱臨溪看魚罾乃知木千年本因材無能

其五

霜威日夜催品物各自警萬麓齊紅碧千林垂短永  
料知天人業收結以剛猛探幽非寸鈞汲深豈尺綆

但須盡吾力成就卽天幸其要淨心界私慾悉遠屏

其六

庭前向陽木自成消長景欲知月轉移靜看牕暗罔  
尋常代儀表天行無少梗誰將自然畫布茲大地騁  
古人如可作吾向包犧請

其七

秋雲倏聚散秋日乍明暗明暗異憂樂天地人有憾  
嗒然倚前楹游目庭下瞰高梧方蔌蔌嫩菊欲淡淡  
常求面前樂勿令分外濫韓公處世者趨時勉而暫  
况我泊岸船波心寧縱纜反照一身內沉浮仔細勘

久久當自別得甌亦吾甌

其八

宅近南山下秋光先吾軒蟲聲繞庭吟螢火過牕奔  
俯仰觀時物曾中日有言妙契常疾書牖後非掩前  
方當熱流金尚或忘我餐况今涼入室曷不理殘編  
青燈夜繼晝衆甫閱幾千譬如和五味使各歸甘酸  
思之或未得黃神質宵眠如是不知老聊以送流年

其九

淒淒雲容淡策策葉聲乾消息遲金丹歲暮懷琅玕  
何來中天月照我床褥團停盃試一問曾經羨與安

月留仙已去滄海水自濶魏子六百年今如盤走丸  
誰能更拘束身不離馬鞍

其十

古稱死不亡人疑是名聲余謂此心法耿耿千載明  
譬如時代序皇天運以誠君看彼月魄何曾異虧盈  
床前有丹經架上有墨兵秋懷不自苦况乃浮雲榮  
但恐真人妙未能如律令

其十一

人生各有好大道是我好每當悟妙處恨不從事早  
餘光苟自力真樂庶可保勿謂學仙侶爲道近枯槁

古來良泌賢孰非孔子道

題東坡草書醉翁亭記後

東坡草書誠奇特飛腕落筆如復覲勁適固善學顏  
公淋漓亦頗效張旭初疑藤蘿縈古木復道槎牙交  
山石雲自變化水自波百詭千奇無不足詞垣書家  
兩絕藝天實命公非由學自我珍藏十五年常置案  
上時寓矚寓矚不覺神颯爽塵中齷齪暫疏瀹文是  
心法筆心畫千載襟懷猶可掬

三大隱詩

嚴君平

隱者隱山林君平何隱市生平明易道禍福皆預指  
山林寂無人何處徵所揣遂向成都市托名賣卜士  
得錢免飢寒端策決疑似曩令不曉易必走雲水溪  
乃知隱者流亦爲伎倆使

嚴子陵

子陵造漢朝歲月曾無多謨聞王室輔足向帝腹加  
一去留名節百年長餘波始信經世法不在言語科  
向使彼子陵黽勉作廟犧末後所成就較此果如何  
篝燈讀史餘感慨一浩歌

陶淵明

國以人爲國無人國不國吾觀晉爲國淵明一士足  
詩續三百篇節擬九秋菊至今青史上使晉不寂寞  
晉若無淵明五季何以擇所嗟淵明生值晉百六厄  
心遊羲皇世身滯邑令職

峒巖碑歌

我昔銜命使幽燕篆隸旁求堆滿前中有方丈一古  
紙宛如列印小兒拳珊瑚水底枝柯交箇籟池邊苞  
籀聯高卑天地綴方圓錯落星辰叅句連或似鼇足  
擎波浪或似龍爪穿雲煙首尾爲字七十七嗟我始  
讀却茫然石韻篆鏡積案上今文古文互勘研大抵

髣髴後世銘鋪張治水勞且惰疑是虞史承命紀屹  
彼岫嶺山之巔曾聞韓子登岫嶺不見此碑涕漣漣  
祇今誰有好事者搨摹遠流萬里傳嶧碑至唐已云  
亡棗木翻刻失之妍何況韓子所不見一千年後詎  
復全雖然字體極整牙陽冰友直鑽彌堅後世何人  
能爲此定是邃古玄中玄吾生慕古甚韓子傾橐換  
取歸東天招工爲障掛中堂重之不啻青瑤鐫周宣  
石鼓世益下詞垣歌詩聯累牋如何虞時逸書文寂  
寥尚無歌一篇我今作歌歌禹碑破除羣疑詔萬千

文章仙歌

太白之詩子瞻文羽衣仙客下彤雲生龍活虎入馴  
擾芝草琅玕歸耕耘波濤往往筆下起五色成丹出  
爐熏詞垣今古月朝評皆稱仙客仙客云中有一段  
疑案在仙客本自厭腥葷葷伊何富貴是二子胡  
爲猶斷斷君看孔門有若言酷類聖言幾無分高堅  
鑽仰大心法何會跂及顏氏羣二子仙家亦有若徒  
把文章凌紫氛倘令二子得真訣九轉神功輸天君  
上可駕鶴薄煙霄次亦乘鯉游清瀆爭似空名耀千  
古自家冥漠不見聞

和陳子昂感遇詩韻三十六首

并序

陳子昂感遇詩斷非建安以後作者所及杜子美稱其聖賢騷雅韓退之稱其文章高蹈朱夫子稱其丹砂空青金膏水碧實物外難得自然之奇寶但恨不精於理而託仙以爲高也蓋其微旨若曰子昂託仙欲因此以發儒道如參同契之借金丹以發先天之妙但其識有不逮爾余於暇日次感遇詩韻非敢妄擬格調聊欲自試其識之逮不逮云

月魄含日輝數法生降昇金鼎天符顯玉燭陽明凝俯仰際且蟠向背分替興玄化渺難覩聖言以爲徵

其二

白雲在中天日照化紅青晚耕難食實早植易抽莖若謂皆定命物有不種生所以聖繫易天道貴財成

其三

牛李相分爭私門各樹功不知媒淪亡但欲辨佞忠悠悠此倚伏何待塞上翁箕疇淫比戒反應福極終

其四

達士志天下營產迂且蒙每被鷓鴣笑自誇鵬鯤終此非口舌爭天運參其中從古幾聖賢未救世道窮

其五

時節忽不居明鏡吾老矣白首歎無成青春悔謀始

辨此香一炷換彼臧三耳杜門斂蹤跡願從赤松子  
其六

蒹葭露爲霜宇宙肅以清草木皆荒落感此欲久生  
天地常流謙鬼神亦忌盈吾當學大道三才得其平  
其七

包犧初方圓玄象何悠悠連山變農夏反對成文周  
仲尼玉振金先後同一丘繫辭本光明誰復配公侯  
其八

易圖傳隱者丹竈妙研窮靜看龍飲食時令虎嘯風  
茫茫天地化都付一身中道成筆之書門戶開魏公

其九

至言待賢者寧供俗士嗤珍重授鍾呂飄流至希夷  
真儒忽挺生理數各分持尚有劉牧類圖書厚自欺  
其十

其十一

天上運日月人間成冬春大地居其間孕毓砂汞珍  
渾渾此一氣俯仰本洪白如欲成黃輿須先合天人  
其十二



青鳥杳消息丹鼎尚蹉跎歲月同過隙感歎其如何  
非無服食棗仍成鹵莽禾黍同有真訣朱雀飛遇羅  
其十三

仲尼起衰周志欲挽熙和棲棲齊楚路轍迹幾回過  
鳳鳥久寂寞蛾述空講廟乃啓千載統得位較如何  
其十四

木鐸初返魯荀簾一洗淫莊濠分雅頌清濁明鍾林  
遂令父母國齊高泰山岑何如一時砥暫歌擊壤吟  
其十五

宋仁欲正音羣賢亦應期大樂不還魂小知紛揚眉  
終古物善鳴盖由天假時君看魯兩生白首空下帷  
其十六

蒼蒼雲間松落落歲寒姿孤根閱三春黛色貫四時  
偃蹇老瓊苑笙簧奏玉墀何必棟樑充清陰生遠思  
其十七

三王雖異治五學本同途時平可貯才世難能捐軀  
降自膠序蕪寂寂觀室隅後來淫朋類等是詩家奴  
奈何羹椀懲吹盡薤楸孤  
其十八

燕君重賢士爲築黃金臺黃金非不寶豈若賢士哉

死骨一日市生駿千里來功因士聚集名與臺崔嵬  
歎息冀北野祗今荒草萊

其十九

可憐張九齡鍊金日見欺洞仙夜促膝禍胎曉燃眉  
無乃道不同悟真殊濟時夷吾愚賈販易牙辨澠淄  
明知不相兼感慨一涕洟

其二十

世人舍靈龜外物朶其頤利慾營百途數命對九疑  
疑原韻作礙礙與疑同紛紛樹門戶聲勢各互持豈惟眩是非  
亦復爭刀錐自謂人勝天傾覆俄頃時

其二十一

吾觀知命士俯仰合三才鑽研古經籍芸鋤宿污萊  
功力浩濶帷神靈佑登臺復性且延壽曠然一快哉  
回視傾奪類寂寞已隨埃

其二十二

卓哉鴟夷子越難定須臾身既辭卿相家何積金珠  
得非扁舟泛不逢羨門徒人生貴與富同一累塊蘇  
鴟夷能解此金珠亦沉湖

其二十三

老氏說寵辱欲人貴大患辭雖近抑揚理實見闡干

希夷亦有語優喜勿久歡今古至人戒皆出先天言  
寧用棄龍鱗空自逐鼠肝風波閱世味早知橘甘酸

其二十四

鳳凰何所棲恩山青一眉將爲瑞世出常與麟龜期  
周衰久不至宣聖歎且泐醴泉代瓊漿竹實視石芝  
青黃別鸞鷓亦猶龍與螭吾老去聖遠何因得見之

其二十五

周公不入夢宣聖歎吾衰豈伊誠或替感此道已遠  
魯郊狩有獲麟筆停乃泐世運豈不料素志非自期  
蚩蚩當時人歎不詈且嗤至今絃誦地皆祖聖之時

其二十六

龍雖噓成雲無雲龍飛難雲亦佐龍雨相須非誇謾  
乾元動爻象甲子配支干自從六籍初已比魚水歡  
若使無功業何異夢邯鄲俯仰觀物理念之重自歎

其二十七

劉向夜校書帝遣太乙精天眷旣如此當世曷不行  
雖登夔龍位常與梟鳶并譬如鵬受制不能徙南溟  
雖然啓七略區別傳與經班史莫敢違亦是儒林英

其二十八

異哉咫尺儀觀天又察氛股弦自成象躔度如披雲

誰能爲此制伏羲先天君璣象備堯舜靈臺起周文  
漢唐諸巧思膠固不能分乃知聖神智千古莫與羣

其二十九

先天觀景表至妙悟中杳亭午樹木影長短自同科  
中常常必中舍此更求何推類三才道歷歷皆爬羅  
中夜自舞蹈寄語諸述蛾欲得先天則景表以爲柯

其三十

有客老謝事高齋闢道林架插鄴侯書橐無越使金  
清宵坐焚香爐霏上燭陰精思入乾坤妙悟在枕衾  
尚遺泉石想遑論歲月尋養性有捷徑回笑戲五禽

其三十一

我無田何業誰設鄭公鄉謀計老轉拙一身理陰陽  
魏公去已遠墜緒尋茫茫禱治入赤門通理協黃裳  
勿謂馳別逕其言本素王比悟拙添法謹密候存亡

其三十二

吾愛陳子昂依稀窺道真先天與元命譚者幾詩人  
資性若不近見到必無因恨不遇魏公仙容薰炙親  
伊人本在世絕境久避秦奇芬若天花功力勝胡麻

其三十三

昔聞龐德公一生隱鹿門徒知飯牛樂時問籀龍窻

抱膝歌於忽吾道拙自存較看孔明出優劣何須論  
人無出與處貴在道有源源亦非一塗難以淺見言

其三十四

晉代博雅士張華稱爲元識能辨龍肉志亦多奇論  
讒說雖時行寵光逾益敦如何宋漁仲獻書位不尊  
一出雲無心千載舌太煩獨有紫陽子純褒至今存  
細看士窮通令人智每昏

其三十五

何月無三五澄光獨中秋何樓不得月先得近水樓  
兩環遞轉運萬變自浮遊反復觀吾道至理可校讎

滄海泛大地崑崙啓中州源深流浩浩根厚勢悠悠  
培塿及蹄涔徒爲山川羞君看千金家太史稱素侯

其三十六

大化無窮盡小智好側生常以燕蝠見強作蠻觸爭  
聖人不出戶明知符黔羸包犧立天度周公營洛京  
歷落天地象胷中自縱橫後儒推日月不省磨蟻行  
相與操室戈有時觸心兵周髀元聖書漢世亦不醒  
禮失求諸野真訣自西溟東來又百年先天孰裁哉

對雨書事

秋雨洗天天益涼紅葉滿庭菊已荒山茗一甌氣方

舒案上經卷手自張舊讀如逢故人話新得恨無良友商機心習靜頓相忘簷鳥近人故不翔

讀梓人傳

都料爲匠師床足不自治及營萬間廈揮擢唯所爲大才愚於小智者所嘗疑太公與管仲豈非王霸師求魚迷釣釣販利欺刀錐跡其平素才一縣猶不宜末後彌綸業千載稱絕奇和璧璞必包珍汞鉛爲皮至寶天所惜其初掩晦之

讀鍾離權事實

鍾離年五十爲將討晉氛軍敗陷大窖邂逅遇真君

高驤仙府班直至宋初存時與洞賓輩遨遊湖湘漬勿謂此事誕紫陽亦云云當時軍敗失青史遂無痕但道鍾離子豈知晉將軍吾聞儒論人截自成德論一日能克己天下皆歸仁無乃此法門儒仙一轍均

敬和 御賜國朝寶鑑纂輯廳詩韻

於皇 列朝化百世不能忘王牒乾坤大蘭臺歲月詳效勞慙漢史寓慕仰堯牆繼志兼摸德悠悠 聖思長

奎章閣春帖子二首

條風初動土牛塵宙合樓前瑞色新人事會從天意

伊晚齋集 卷二  
驗重輪將啓八荒春

其二

俯仰玄機次第開嫩陽先報斗杓回循循成就雍熙  
象天與君心一本來

奎章閣延祥詩六首

紫極迎新歲天人正始辰龜疇呈五福鳳曆紀千春

其二

端月初臨日三元會合時詞人方撰頌麟趾及螽斯  
其三

臘雪徵三白豐年綏四方從來八百業實賴萬千倉

其四

豈弟作人效明廷吉士多淵魚旱麓詠梧鳳卷阿歌

其五

治化登三五文章煥泰平皇王雖異世禮樂可同聲

其六

榦楨何濟濟瓜瓞自綿綿况是周王壽邦基啓八千

燕雲歌送冬至上副使

并序

昔歲戊戌家弟領相爲瀋陽使洪漢師

良浩

作盛京歌

二十七韻以爲贐豪健逸宕我東歌行未之多見今  
鄭相國

存謙

爲冬至上使漢師副之屢責以贈處之義

作晚齋集卷二  
於是變漢師之盛京歌爲燕雲歌依其韻以奉贐鄭  
公兼簡漢師

崔嵬燕雲城自古帝王京如何衣冠盡久矣氊裘并  
侯度萬國重亞歲玉帛年年馳旅庭大東丞相與侍  
郎今又銜命藉君靈我昔再飲燕雲冰西山尚在  
眼中青送子將欲歌燕雲北風颯颯吹羶腥山河空  
衛故都壯城闕半是前朝成周鼎枉被楚狂問旄頭  
却照箠食迎史瞿二老徒焦唇東南席卷歸建瓴天  
時今過百年運大廈能無一朝傾秦皇猶撫萬世念  
城堡處處增鐫肩峻函百二亦難恃何論荒野短長

亭 聖朝卽今簡使命上公出自班擘嶸此去好講  
內修策歸奏丹墀行東瀛潛翁曾獻錢車議月老請  
正學庶牲城制堅完說山海俞趙每恨徒聞名三百  
年間彌綸業太半前輩觀國英男兒爲國平生志一  
出疆外不虛行方今 聖人貞百度殊俗聞之歎且  
驚陸生寧携越橐金李將應變朔方旌正元朝罷日  
無事爐霏拈筆記行程煙樹蒼茫薊門關塞月朦朧  
右北平正陽門外琉璃廠圖書充棟可日耕風土俗  
尚備盡載野廬職方詳略爭歸歟示我老太史用破  
外制疑信縈歷數使職不外此上宣 后德下順情



伊晚齋集 卷二  
嗚呼燕雲之歌歌屢閱使乎使乎將善鳴

西遊詩 并序

上之七年癸卯春正月大臣言平安監司徐浩修離  
違兩老親比及周歲請許遞 上曰待其父奉朝賀  
往返後許遞未晚也於是臣命膺以原任奎章閣提  
學詣闕拜辭閣吏謂有新頒節目成送路文於驛站  
遂以休退之身騎駟廚傳下往平安監營留十五日  
受其榮養既歸爲西遊詩三十韻備述經過以寓感  
頌之意

恭承 至尊命倣理西遊裝平朝詣闕辭珍劑自天

香乃出國西垆駟騎胥騰驤旗影遞近遠角聲時短  
長周道平如砥千里不贏糧及入關西境士民如堵  
墻處處設帷帳紛紛傾壺漿感此殷勤意駐馬爲一  
嘗我有何惠澤民自懷翳桑長林忽入望妓樂列成  
行迎我坐帷榻子孫拜蹠蹠到營謁家廟坐堂見少  
娘細推按察歲今纔七年強翻思風樹恨話舊爲感  
傷選勝辨水戲錦帆溯流揚樂奏魚龍躍舞僂鷗鷺  
翔詢亭曠落成于今幾星霜儒武試名園絲竹喧高  
堂分曹列左右飛竿引興長瞻彼九三院先人舊甘  
棠多士所絃誦衆民所瞻昂經理至三世標望箕都

坊爲我集鄉老讌娛院之傍野人競匝席觀者繞成  
岡忽如再仗節衣錦歸梓鄉借問諸先輩此事孰比  
方在宋趙清獻就養會菘疆生平有至戒歡樂毋濫  
觴留連及半月歸路坦康莊靜思皆造化作此詫恩  
光

庭列八歌

梅花塢種之槎牙培新土青枝經冬短長抽冷蘂先  
春點綴吐鶯燕蜂蝶摠莫知象外造化誰爲主我不  
寄遠何須折閒對書牕香一炷

其二

杜鵑壁此花潤州異品格山榴映紅名不一况復九  
秋菩蕾圻我國杜鵑真杜鵑百花之先開灼爍令我  
墻壁皆錦繡栽培不用費人力

其三

薔薇架風送濃香入吾舍紅霞絕無猩猩染黃雨時  
因燕燕下安得海國傾露法向我藥裹爲一瀉剩使  
庭宇不寂寥芬芳連春復接夏

其四

海棠籬子美無情吾甚疑艷翠隱隱帷環列嬌紅間  
間繡離披世人不見蜀中產却以無香爲花疵無香

伊晚齋集 卷二  
有香不須論花中神仙舍此誰

其五

紅蓮盆平生愛蓮栽近軒豐盈一洗繁華態蘊藉都  
無嬌艷痕魚鳥不思江湖闊掉尾刷翮樂且喧老翁  
倚杖亦自適觀物安用大小論

其六

翠松屏偃蹇長護我門庭一榦千條却庇根嚴霜大  
雪不改青自我種來今如此何年樹底生茯苓  
怡顏唯日夕好令高人養性靈

其七

石竹砌青紫紅白遶庭際世人常蓄花五葉此花千  
葉色更麗華能富貴節君子二美得兼誰與媿何况  
花性亦耐久自夏及秋長相繼

其八

萱草欄繞植盆池擬欄干鸚翎鳳爪猶俗語道粧仙  
骨不我謾忘憂宜男復可殖實用元來勝幽蘭試問  
品題花草間事業古今何人與較看

謙歌

老夫清晨驚剝啄有客來訪初設席手指床頭數篇  
書亶亶語及謙之德謂言一字貫三才其惟謙乎載

仙隱齋集 卷二  
大易天固益謙地流謙人於其間好惡亦此理不必  
求諸遠日用淺近可以得尋常文字出示人我有矜  
心人必斥不然我以謙下問人亦謙下攄心曲其言  
雖近其旨遠推類以長無不足損之又損至無爲吾  
於老氏取三策人能處盈執此道天降其祥鬼降福  
遂作長歌述格言一生莊誦勤佩服

讀道經

老病清朝謝事身杜門聊與道書親還丹守黑非無  
術駕鶴騾鸞未有因極北旋樞能注想斗南斟酌可  
通神儒仙立脚雖殊軌攄把天君作道真

自嘲

明代王公恕八旬始志學史氏嘉其爲特筆大書策  
今年年七十斯道欲自力王公如有知應許差早覺  
但顧我平素多愧公正直本之則無有早覺亦何益

大成行

青牛老人曾有言大成若缺用不窮憶昔少年氣方  
銳或聞此語耳如充而今暮歲多經歷反復深歎亦  
可宗人生世間每求全徇名好貨位欲隆假令一時  
智力致運去勢盡徒喪躬天高在上縮西北地隕承  
下虧南東人於其間藐然物寧敢事事皆圓融至人

作暇齋集 卷二  
達此守謙虛始終若一百年中邵稱五千得易體孔  
曰老聃折禮衷不取其道取其言可見聖賢心大公  
敬和 御賜瀋陽使李右相 福源 詩韻  
相國輜車下朔幽 宸章珍重慰行翰山河萬曆成  
樛堡玉帛平丘子產愁觀樂誰從論得失誦詩難與  
語啁啾祗應路左垂紳處殊俗驚看第一流

獨酌書事

老方崇飲飲微醺醺卽襟懷拍拍熏名利都忘身計  
定逢迎皆謝路歧分陶潛晚就歸田賦仲統先爲樂  
志文小閣捲簾香一炷論交四友每成羣

燒香

物理研窮五十年今朝了了察天淵辨香更讀參乎  
語萬法皆歸一念前

敬次 御賜鶴城君几杖宴詩韻

尚年 王政自宗人几杖臨加九耄身行葦恩添南  
極彩肆筵歌入 北宸春生丁少昊流虹歲官衛神  
堯御宇辰一老天遺紆 聖感寵光朝著孰同倫

放言九首

今朝痛飲一甌醪斗覺胸中氣岸高謹慎工夫都索  
莫狂言筆下忽陶陶

何明齋集 卷二  
其二

海上篙工慣使船風波幾度仰呼天  
白頭更向平流去  
罨畫溪中日叩舷

其三

康節人豪蓋世知春風秋月視雍熙  
仙家攢簇元同法  
一歲抽添一日時

其四

東方人物擬中華著述猶慙小說家  
問解數篇稱第一  
三通奈有望洋嗟

其五

驚聞羣雀噪庭中起看惟爭一腐蟲  
萬壑千林多美實  
何須摧折羽毛空

其六

三分天下戰爭秋志士猶懷統合謀  
如何門戶玄黃弊  
一介曾無爲國憂

其七

逢時管子補前虧無命龐生起後疵  
人生展布皆天定  
素位安行聖以之

其八

巳卯羣龍稷契儔一團疑案至今留  
近思數卷書雖

盛大國治規詎盡求

其九

靈星正祭自周家罷醮誠宜罷此何遂媒後世辛祈  
禮識者常疑祀典夸

處世

處世雖多法其要避禍胎名高人必忌貨積鬼常猜  
養拙危何有居謙福自來婁公憂拭唾言近意悠哉

六言

浮雲世上名利歲月閒中簡編一炷香煙裊裊三才  
道法玄玄

一碧亭吟示孫有本

屢閱風波慣處憂田園况復任優遊身同雨外投林  
鳥心似帆前逐浪鷗為納山光時捲箔故迎江月獨  
登樓多生結習都忘了猶講先天蚤夜求

觀漲與有本分韻二首

造化神功儘壯哉江山一夜太初開平原蹴浪兼天  
湧列嶼盤渦匝地迴隣浦市聲生嶺脊前湖帆影落  
樓臺推牕一望襟懷豁命僕頻領掌上盃

其二

兼旬無奈失岡巒今日山腰細路漫水落魚龍渾得

所雲晴禽鳥各知歡高林滴瀝猶餘濕快閣憑陵尚  
覺寒會待中天新月好擬携兒輩上樓看

龍山精舍八詠

涵碧亭

山光青欲滴水色碧於藍并繞亭前後悠悠日夕涵

披襟岡

美哉岡體勢文以石縱橫演出龍圖象龍山不浪名

聚勝寮

燕室雖低小軒牕足爽清千峯雲外直萬卉鏡中明

迎灝榭

桂輪江浦夜潮信海門秋小榭居要脊登臨一目收

仰天池

紺房宜照日羽蓋喜翻風無乃華山是天然石井中

倚欄塢

康節詩云賞花全易識  
花難善識花人獨倚欄

紅白間蒼翠綿延錦步障觀花觀造化邵老昔傳方

繞秋畦

士如咬菜根民可無菜色遶舍開三區勝似三槐植

煖春園

園中有佳實入口類瓊漿每向飯餘摘春風和老腸

遣興



伊晚齋集 卷二  
暮年活計了殘書深悔當年出世疎山齋永日門常  
掩悟得從前憤悱餘

敬和 御賜家弟判府事周甲詩韻

六甲初回鼎鶴臣天時正值菊花辰 九重寵賚兼  
宸翰留作吾家世世珍

次東坡梅花詩三疊韻

冰滿江干雪滿村何來羅浮山下魂臃腫古查半蒼  
苔短長瘦枝斜黃昏初疑明珠出粧奩復訝粉蝶飄  
芳園無乃盆心有葭瑄一陽先噓盤根溫青紗爲幃  
遮外風早起手褰納朝曦看梅殊異看凡花標格韻

致非一門我欲更續石湖譜此中欲辨已忘言爐霏  
燭陰澹相對影落床頭綠蟻樽

再疊

育梅盛稱孤山村未聞閭裏貯冰魂我居今得兼二  
者不離出入朝與昏天公許專造化權倡先百卉三  
春園誰譏詩老迷格韻我謂花品貴淡溫精神寒通  
積雪白氣象藹接晴暉瞰偏喜君子常在座却恐綠  
衣夜款門看君妙處在無言愧我平居病多言於今  
始得三益力掩戶癡坐但傾樽

三疊

老人高臥江上村欵乃聲中對香魂疎疎庭竹伴貞  
標皎皎簷月期黃昏但恨不得清江植偃蹇盡覆屋  
後園牕前別栽兩三樹紅白相映待春溫不必借得  
華光筆真箇常行水邊瞰他年若栽千樹滿弊廬增  
重九里門香中清韻默心契卅六宜稱不須言雖然  
真趣醉後長每向花下輒携樽

乙巳除夕與兒澄修孫有桀守歲用江韻各賦  
乙巳歲將除守歲龍山江日御弭亥次斗柄向寅扛  
天時終復始忽如麾旗扛人情惜此夜家家睡魔降  
况我望八翁髮短眉欲厖兒輩亦喜懼騎驢度雪砭

遂成團圓坐細傾潑醅缸論文復論詩間以齊諧哢  
何必絲與竹松風送隴瀧雞唱新歲聲燈殘去年缸  
江千人應行時時吠村狔憶昨趨閣班不寐聽鐘撞  
冠裳詣闕下軒車雜驪駟覲光誠藹藹稱賀鼓逢逢  
還家謁廟退子孫拜雙雙年新事亦新喜慶同家邦  
一自居江上朝夕對舩艤悄然臥袁安誰復拜老龐  
獨有五雲夢中宵和流淙語罷仍回首曙色倏上牕  
西隣簡稼器東里理牛椿傳道 九重裏新頒綵勝  
幢陽和暗動脉積冰將成泮柳條看猗猗鳥聲覺鏗  
鏗吾亦思種植擬待春滿腔分付山家奴柄鋪須縱

從

即事

臨江亭野足盤桓境僻村深洞府寬行止任天吾道  
是棲遲得所老身安水流雲去渾相悅鳥語鱗游各  
自歡花木春來栽瀾漫山家從此不貧寒

初夏與孫有繁分韻二首

勿言春過盡怡悅有清陰午日時穿竹薰風夕滿林  
衙蜂捎卉晚堂燕補巢深繞塢栽紅藥看看已擢心

其二

小亭多樂事清景足滄江魚出波心尺鷗飛鏡面雙

看雲常倚杖候月獨憑牕邂逅逢山客何求折慢幢

次杜工部遣興詩韻五首

古人不可見可見古人心心同道則同道自無古今  
我洋一小技亦喜有知音况乃此心法千載相追尋  
百慮歸一致清風滿書林

其二

司空匪隱者早歲從幕府如何屣榮寵終竟守孤苦  
造朝佯墮笏還山永脫苦岸幘休休亭圖書連屋聚  
每讀唐史傳竊嘆知去取

其三

吾愛杜中書庶幾儒者道綠野太佳麗栗里偏枯槁  
蕭灑水竹居編摩窮暮早遂成通典書百世見素抱  
其四

魚鬢見餌張蛾眉遇燈狂文端笑此態翩然舍還鄉  
時節會子孫自言世念亡園林遊衍樂遲暮足清涼

其五

六一歸潁上筆研親夙夜形骸尚云忘業緣胡不謝  
譬如食爲性雖老甘如蔗精言滿天下一唱三歎吒

江居樂四首

藜羹飽後穿屩流水門前倚筇斜陽半蘸平野夕霧

橫拖欹峯

其二

江山鋪作屏障卉木參成畫圖兩兩輕鷗對浴翩翩  
小艇施罟

其三

籬前紅稻初熟舍後黃苞足收江市去賒新蟹老夫  
先已有秋

其四

將相功名一世圖書事業千秋午橋文杏何在武塔  
祥雲永留

卽事

春還江閣坐悠然默看羣鷗下上翩少閱風波忘寵  
利老憐衰病學神仙飯因新饌傾盃飽書遇嘉言索  
筆編莫笑山翁無補世晴空亦有戾飛鳶

丙午除夕書懷

平居凜凜病常嬰誰道吾年七十羸家乏甑儲猶飽  
煖朝無黨援亦功名謝亭初傍青山闢杜典今從白  
首成欲向丹爐調火候抽添一法柰迷程

丁未元朝三首

是日居然望八翁飛揚氣習尚兒童後生來賀年彌

邵老我偏慙德未崇

其二

如何少日喜求名纔欲求名德不清無悶繇辭曾熟  
講老多經歷見愈精

其三

儒家仙品道雖殊總把靈臺是究圖新歲閒翁何所  
祝吾心常不出吾軀

江湖

江湖穩臥懶殘翁翠竹蒼松似梵宮竟日編書噉飯  
外更無一事到心中

雜詩三首

少懷天下念老志子孫安歛退緣知足栽培為遣閒  
晚歌煙外浪春色雨中山四壁圖書靜幽禽近竹欄

其二

遐心久忘世世不棄君平謝事猶招謗休官亦介榮  
文章慙黼黻言論孰權衡篋裏書三部他辰覺有情

其三

江村殊靜寂事事愜幽情白鳥籬間睡黃雞屋上鳴  
酒槽聞雨滴茶罐試波聲宅此經年久沙洲不識程

休言

休言處世浩難裁古聖曾將數法開事必研幾寧有  
躓心能安分自無灾三才道把居謙貫五福基從不  
比來到得霜清仍水落方知此語意悠哉

第九疇五福為第五疇無有此德之應第六句之意出此

漫興

一病便願養長閒愜素期道窺前聖秘文勘後人疵  
白髮江湖晚青編歲月欺頰昂時有得默默只心知  
丁未五月十五日夜夢作

喜怒恩讎摠兩忘天門寥廓坦康莊箇中欲識真消  
息積雨初晴旭日光

保晚齋集卷第二終

